

# Акафист святому священномученику Антипе, епископу Пергамскому

## От зубной боли

*Священномученик Антипа был учеником святого апостола Иоанна Богослова и епископом пергамской Церкви в Малой Азии. Несмотря на то, что в то время император диоклетиан воздвиг гонение на христиан, святой Антипа усердно обращал ко Христу язычников. Император велел бросить его в раскаленного медного быка в Идолском капище, но тело его не сгорело и было погребено христианами.*

*Святой Антипа имеет благодать исцелять от болезней, особенно же от «удручающих зубных болезней».*

### Кондак 1

Возбранный чудотворче и изрядный недугов целебниче, по данней ти от Господа благодати, яко имеяй дерзновение к подателю здравия, от всяких нас бед и недугов свободы, да зовем ти: радуйся, Антипо, скорый помощниче в болезнях наших.

### Икос 1

Ангелов и всяя твари содетель, явивый тя Церкви Святей всесветлаго светильника веры и за веру твердейшаго алмазана священномученика, научает нас восхваляти подвиги твоя и воспевати тя, священномучениче Антипо, сице:

Радуйся, богомудрый наставниче православных веры; радуйся, яко источил еси реки учения, верных напаяющия.

Радуйся, яко мутныя воды многобожия потребил еси; радуйся, яко демоном служащая чествовати Бога истиннаго научил еси.

Радуйся, яко из глубины безбожия извлекл еси заблуждшия человеки и наставил еси их на путь спасения; радуйся, яко дреманием нечестия одержимыя возбудил еси к разуму истиннаго боговедения.

Радуйся, Антипо, скорый помощниче в болезнях наших.

### Кондак 2

Видя лютое гонение неправедных на благочестивыя христианы, не убоялся еси прещения их и мучительства, богоизбранне, но дерзновенно пред лицом их истиннаго Бога исповедал еси, вразумляя тех обратитися от суетных Идол ко Христу Спасителю и выну пети Ему: Аллилуиа.

### Икос 2

Среди язык, сидящих во тьме и сени смертней, сохранив непорочность жития твоего, святе Антипо, Ангелом сожителю быти сподобился еси и с ними воспевати троическую песнь Богу на небеси, услыши нас, поющих ти на земли похвальная пения сия:

Радуйся, житию безплотных поревновавый; радуйся, чистотою Ангелом уподобивыйся.

Радуйся, во плоти явивыйся аки безплотен; радуйся, в теле поживый духовно, на земли небесно.

Радуйся, небесный человеке; радуйся, земный Ангеле.

Радуйся, Антипо, скорый помощниче в болезнях наших.

### Кондак 3

Силою благодати Божией, еще сый в телеси возсиял еси яко солнце, всех просвещая и разгоняя глубокую ночь безбожия. Сего ради почитая тя, яко сопрестольника апостолов и целеб подателя, воспеваем Богу: Аллилуиа.

### **Икос 3**

Имея неусыпное попечение о спасении душ во тьме идолослужения погибающих, богомудре Антипо, не преставал еси призывать тех к Богоугодной жизни, подавая собою пример совершенного благочестия христианского; сего ради усердно приносим ти похвалы сия:

Радуйся, Образе жития праведнаго; радуйся, указателю неверным стези, ведущей к небеси.

Радуйся, верным ко спасению путеводителю; радуйся, прилежный вразумителю заблуждших.

Радуйся, во обращении идолопоклонников к вере во Христа явивый самоотвержение всецелое; радуйся, архиерею Божий, добре упасший словесное стадо твое.

Радуйся, Антипо, скорый помощниче в болезнях наших.

### **Кондак 4**

Велия буря ярости дометиана, дышущаго убийством, восшуме на храм души твоея, святе Антипо, но того не возможе поколебати, основан бо бе на твердом веры Христовы камени, на немже ты, богоизбранне, неподвижно пребывая, укрепляющему тя Господу Иисусу воспевал еси: Аллилуиа.

### **Икос 4**

Слышавше от тебе нечестивый игемон и жрецы Идольстии словеса премудрости, распыхахуся на тя злобою, паче же егда рекл еси: «едино то веждь, о игемоне, яко христианин аз есмь, царскому же велению безумному и нечестивому повинутися отнюдь не изволяю». Сие убо воспоминая, взываем ти сице:

Радуйся, веру во Христа до смерти сохранивый добре; радуйся, силою свыше на брань противу мучителей препоясанный.

Радуйся, победоносною славою от Христа Победителя облеченный; радуйся, апостолов во исповедании Христа подражателю.

Радуйся, страстем Христовым сопричастниче; радуйся, кровию своею утвердивый правоверие.

Радуйся, Антипо, скорый помощниче в болезнях наших.

### **Кондак 5**

Боготочный источник дивных чудес явился еси, достославне Антипо: приял еси от Господа дар недуги врачевати, да познают неверующие Бога, Яве тобою чудодействующа, и воспоют Ему: Аллилуиа.

### **Икос 5**

Видевше людие града пергама, яко дадеся ти благодать немощных исцеляти и от всяких телесных и душевных скорбей избавляти, удивишася, мы же за многая исцеления тобою на ны изливаемая, ублажаем тя похвалами сими:

Радуйся, болящих исцеление; радуйся, расслабленных укрепление.

Радуйся, недугующих врачу благодатный; радуйся, скорбящим непостыдное прибежище.

Радуйся, яко тобою от многих ран грешнии исцеляются; радуйся, яко тобою от всяких болезней с верою призывающии тя избавляются.

Радуйся, Антипо, скорый помощниче в болезнях наших.

### **Кондак 6**

Проповедником истины, Христовым апостолом поревновав, не убоился еси зверонравных мучителей, не ужаснулся еси прещения, но со дерзновением проповедал еси

им Христа Бога, Егоже ради в разжен сосуд медян ввержен был еси, да прославится тебе ради дивный во святых Господь, Емуже ты и в огни взывал еси: Аллилуиа.

### **Икос 6**

Имея велию ревность о людех Божиих, ты болезновал еси о погрязших в бездне идолопоклонства и ради спасения неверных готов был еси, якоже божественный Павел, сам отлучен быти от Христа, возлюбленного тобою. Сего ради со умилением взываем ти сице:

Радуйся, отцу верующих Аврааму в ходатайстве о грешницех подражавый; радуйся, Боговидцу Моисею в пламенной молитве о спасении неверующих поревновавый.

Радуйся, новый самуиле, в молитве о беззаконницех глаголавый: «Не буди мне, еже не вопити о вас с молением ко Господу»; радуйся, подражателю архидиакона Стефана, во время страдания в медяном воле о мучителях сотворивый сицевую молитву: «Господи! Не постави им греха сего».

Радуйся, яко незлобив сый, за убивающих тя молился еси, яко за благотворцев; радуйся, пастырю любвеобильный, положивый душу свою за словесныя Овцы твоя.

Радуйся, Антипо, скорый помощниче в болезнех наших.

### **Кондак 7**

Хотящу незаконному мучителю лестными словесы отвратити тя, Антипо, от истиннаго Бога ко Идолу бездушным, ты, богомудре, отвечал еси: пришед в последнюю старость и к смерти приближився, не изменю веры моя в Иисуса Христа, Бога моего, Емуже со Отцем и святым духом присно пою и во веки веков Имам пети: Аллилуиа.

### **Икос 7**

Новое чудо показа Господь тобою, егда ты по велению злочестиваго мучителя ввержен был еси в разжен медян коноб, в немже яко хлеб сладкий испеклся еси и в воню благоухания святей троице принеслся еси. Благоговейне Убо воспоминая сие превелие терпение твое, блажим тя похвалами сими:

Радуйся, позорищным ввержением в разженный сосуд гордыню мучителя низложивый; радуйся, яко огонь любви к Богу в сердце твоем до конца жизни сохранивый.

Радуйся, яко Христа ради огнем кончину приявый; радуйся, твердее камене в терпении явивыйся.

Радуйся, яко укрепляемый Христом Богом, преславно жизнь на земли скончал еси; радуйся, пресветлому мученическому лику сопричтенный.

Радуйся, Антипо, скорый помощниче в болезнех наших.

### **Кондак 8**

Странно бе видети языком, неведущим Божией силы, како в слабом старческом теле возмогл еси, святителю Антипо, претерпети за Христа лютейшия муки: мы же, благодаря о сем Бога, даровавшаго ти таковую крепость, с любовию взываем: Аллилуиа.

### **Икос 8**

Весь предан был еси Иисусу Пресладкому, святителю Антипо, и сладце Его ради горькия муки в огни претерпел еси, глаголав бо еси: «Чашу страданий, Юже даде ми Господь, не Имам ли пити»; темже и сам показался еси Аки чаша, сладость чудесных исцелений изливающая всем, вопиющим к тебе таковая:

Радуйся, всею душою возлюбивый Иисуса Пресладкаго; радуйся, пастырю, словесным овцам во Свята Святых путь показавый.

Радуйся, реко, орошающая мир водами благодати Божией; радуйся, неисчерпае мый источниче чудесных исцелений.

Радуйся, сосуде, на вся недуги врачевание неоскудно изливающий; радуйся, яко Господь сил дивная на тебе явил есть.

Радуйся, Антипо, скорый помощниче в болезнях наших.

### **Кондак 9**

Всякую стяжал еси чудодействия силу благодатию дивнаго во святых Своих Бога, святителю Антипо: не токмо бо молитвами твоими устрасил еси бесы, но и совершенно из града пергама изгнал еси я. Воспомяя сию победу твою над злыми духи, благодарне вопием Богу: Аллилуиа.

### **Икос 9**

Ветийство человеческое не довлеет изрещи, коликую приял еси, святе Антипо, от Господа власть изгоняти от людей диавола с лукавыми демонами, за Еже мы восхваляем тя сице:

Радуйся, всяческих козней диавола разрушителю; радуйся, сатаны посрамителю.

Радуйся, стужаемых от бесов свободителю; радуйся, демонов отгнателю.

Радуйся, темных адских сил устрасителю; радуйся, от негоже духи злобы, Якоже дым, исчезают.

Радуйся, Антипо, скорый помощниче в болезнях наших.

### **Кондак 10**

Спасти хотя душу твою, презрел еси плоть и не убоялся еси от убивающих тело, святе Антипо; егда бо услышал еси осуждение на сожжение в медяном воле, ты радостно приял еси Оное, воспевая господеву: Аллилуиа.

### **Икос 10**

Стена еси ограждающая от всяких зол усердно тя в помощь призывающих, святе Антипо, не токмо бо во асии живущим, но и во всех местех сущим христианом твоею действенною молитвою подаеши духовная дарования; ихже ради и мы, отче святыи, ублажаем тя сице:

Радуйся, сосуде, источаяй елей Божия милосердия; радуйся, живоносный источниче, струи исцелений изливающий нам.

Радуйся, скорый возставителю здравия в немощи лежащих; радуйся, всех лютых болезней, паче же лютыя зубныя болезни, целителю.

Радуйся, безмездный врачу болезни душевныя и телесныя; радуйся, подателю врачеваний всем, притекающим к тебе с верою.

Радуйся, Антипо, скорый помощниче в болезнях наших.

### **Кондак 11**

Пение благоприятное пресвятей троице принесл еси, достойный преемниче апостолов, Антипо, не точию умом, словом и духом, но живым всего себя в жертву принесением. Темже, Аще и не довольны есмы к похвалению таковых твоих подвигов, обаче благодарни сущи, поем дивному во святых Богу: Аллилуиа.

### **Икос 11**

Светозарный светильник, от истиннаго Света озаряемый, сущим на земли являешия, равноапостольный Антипо, просвещаеши бо сердца верных и к разуму божественному вся наставляеши, поучая и нас со умилением взывати:

Радуйся, заре Божия света; радуйся, деннице Солнца Правды.

Радуйся, сияние евангельскаго учения; радуйся, светило небеснаго блистания.

Радуйся, просвещаая души верных; радуйся, озаряая сердца ищущих правды.

Радуйся, Антипо, скорый помощниче в болезнях наших.

## **Кондак 12**

Благодать, данную ти от Бога ведуще, радостно имя твое воспоминаем, святителю Антипо, и с теплым молением к всечестному образу твоему притекающе, прилежно молим тя: подаждь цельбу страждущим лютою зубною болезнию и избави всех нас от всякия нужды и печали, да поем Богу: Аллилуиа.

## **Икос 12**

Славную кончину твою поюще, архиерею Божий, и теплую молитву твою к Богу о христианах вспоминающе, восхваляем Господа сил, дивная на тебе сотворшаго; ты же услыши нас, умильно вопиющих ти:

Радуйся, теплый пред Господем о нас молитвенниче; радуйся, присный пред Богом наш заступниче.

Радуйся, добрый наш наставниче; радуйся, о спасении нас грешных сильный ходатаю.

Радуйся, Царя Небеснаго скорый умиловителю; радуйся, благосердый помощниче всех благочестно совершающих память твою.

Радуйся, Антипо, скорый помощниче в болезнях наших.

## **Кондак 13**

О преславный и всехвальный священномучениче Антипо! Приими сие похвальное пение от нас недостойных во умилении тебе приносимое, и богоприятным твоим ходатайством умоли Господа даровати болящим здравие душевное и телесное, избавити всех нас от бед и напастей в жизни сей, по смертнем же успении нашем, в день Страшнаго Суда одесную Праведнаго судии стати и в Царствии славы Ему воспевати: Аллилуиа.

*Этот кондак читается трижды, затем 1-й икос «Ангелов и всея твари...» и 1-й кондак «возбранный чудотворче...»*

## **Молитва**

О преславный священномучениче Антипо, скорый помощниче христианом в болезнях! Верую от всея души и помышления, яко дадеся тебе от Господа дар болящия исцеляти, недугующия врачевати и расслабленныя укрепляти. Сего ради к тебе, яко благодатному врачу болезней, аз немощный [немощная] прибегаю и твой досточтимый образ с благоговением лобызая, молюся: твоим предстательством у Царя Небеснаго испроси мне болящему [болящей] исцеление от удручающия мя зубныя болезни, аще бо и недостойн [недостойна] есмь тебе, благодетнейшаго отца и приснаго заступника моего, но ты, быв подражатель человеколюбия Божия, сотвори мя достойна [достойну] твоего заступления чрез мое обращение от злых дел к благому житию, уврачуй обильно дарованною тебе благодатию язвы и струпы души и тела моего, даруй ми здравие и спасение и во всем благое поспешение, да тако тихое и безмолвное житие пожив во всяком благочестии и чистоте, сподоблюся со всеми святыми славити всесвятое имя Отца и Сына и Святаго Духа. Аминь.